



# Tir Yimyim

www.tiryimyim.in

e-mail : tiryimyim@gmail.com

Regd. No. RNI. NAGAAO/2004 / 13113. Postal-NE/RN-717.

TAPAK 8 Yangia anidakangma : [Tir Yimyim](#) [tiryimyim@aolima](#) [tir yimyim](#) TAPAK 7

**Rooney Plymouth Argyle indang  
head coach kümogo**

**Zelensky-i Biden & Xi na Ukraine  
peace summit nung adentsü jaok**

VOL. XXI ISSUE NO. 224 (ADOK 224) DIMAPUR TENTONÜ (MONDAY) MONUPII (MAY) 27, 2024 ₹ 5.00

**Centre-i Army Chief kümsük atsülangtsür West Bengal & Northeast nung Cyclone Remal sütsü**



inyakogo ta Ministry of Defence-i metedaktsü.

Nisungtemi kanga jembia aruba sulen Gen Pande kümsük atsülangba osang metedaktsüogo. Yimya agi teinyakdak ketdangsür mapanungi anisüngzüksü hopta ka shilia taruba Chief of the Army Staff (COAS) shimba osang metedakja aru.

Gen Pande-i April 30, 2022 nü General Manoj Mukund Naravane ket nungi 29 buba Chief of the Army Staff inyakstsü mapanagi züka liasü.

Pa ya December 1982 nung Corps of Engineers (The Bombay Sappers) nung shimok aser COAS meinyakdang Vice Chief of the Army Staff inyaka liasü. Corps of Engineers nungi mezunguba Army Chief inyakbaji Gen Pande dang lir.

Army commanders seniority nung ajemdaker Vice Chief Gen Upendra Dwivedi-i COAS inyakstsü mapanagi liasü.

Dwivedi dak alia COAS inyakstsü temsüa alirtemji Southern Army Commander Lt Gen Ajai Kumar Singh aser Central Army Commander Lt Gen N.S. Raja Subramani na lir.

Army Rules 1954 nung Rule 16 A (4) den putepa iba mapa

New Delhi, May 26, 2024 (Agencies): Chief of the Army Staff General Manoj Pande May 31, 2024 nü mapanungi anisüngzüksü angutsüba liasü saka Centre sorkari pa nem ita ka apulokstsüogo.

Prime Minister Narendra Modi-i aniba Appointments Committee of Cabinet ajanga May 26 nü Gen Pande indang kümsük atsülangtsü mulunga agizükogo.

Tesüiba nung iba amai kodanga meinyakdangi lioasü kechiyong Gen Pande superannuation asütsüba arishi küm adena pa nem mapang agütsüsemogo. Iba lemtet ajanga Gen Pande-i June 30, 2024 tashi Army Chief inyakstsü.

Army Rules 1954 nung Rule 16 A (4) den putepa iba mapa

## UAPA tribunal-i Meitei telungpur telok 7 noktanger

Guwahati, May 26, 2024 (Agencies): Unlawful Activities (Prevention) Act (UAPA) kubok tribunal kati Manipur nung Meitei nunger telungpur telok tenet tashi küm pungu noktangba pusema nungitogo.

Tesüiba küm 5 tsüngda telungpur telok 7-i Manipur nung ozüng alema 335 tashi inyakogo. Tatalokba balala nung sepi 9 aser civilian 21 tepset ta tribunal-i ashi.

Telungpur teloktemi Myanmar aser Bangladesh nung tesentaktep lir aser tesep amenteta training agütsür aser prangpong-injang bener arur ta tribunal-isa ashi.

Manipur nung telungpur teloktemi India sorkar den yimjung olemtap tagidak aliba National Socialist Council of Nagaland (Isak-Muivah) (NSCN-I-M) den tesentaktep lir ta tribunal-isa shisem.

MHA-i Manipur nung Valley Based Insurgent Groups ta ajaba Meitei extremist organisations tenüngtem metedaktsüogo.

Iba tarense nung Peoples' Liberation Army aser political wing Revolutionary Peoples' Front (RPF); United National Liberation Front (UNLF); Peoples' Revolutionary Party of Kangleipak (PREPAK) aser armed wing Red Army; Kangleipak Communist Party (KCP) aser armed wing Red Army; Kanglei Yaol Kanba Lup

(KYKL); Coordination Committee (CorCom) aser Alliance for Socialist Unity Kangleipak (ASUK) teloktem dena lir.

Sorkari item teloktem anema mapanagi aruba kulitem Ministry of Home Affairs (MHA)-i metedaktsü. UAPA kubok ozüngi noktanga aliba telok nung züngsemtem anema ken o 1,000 tema benoka lir ta parnoki ashi.

November 2018 nungi December 2022 tashi telungpur telok tenet anema ken o 1,019 benoka liasü. Ken o 11 nung parnoki anema chargesheets agütsüogo aser nisung 3 aitsü. 2019-February 2024 nungi telungpur 1,179 tashi apu, 95 temai adok aser prangpong 205 ngutetogo ta MHA-i metedaktsü.

Taküm January aser February nung telungpur teloktemi ozüng alema 24 ben inyak aser idangji civilian 7 tepset aser 13 pur ao.

December 2023 nung UNLF den yimjung tenangzüktep ka nung sign sütepogo aser iba ajanga lemtet ka agitsü lenmang lapokstsüogo ta MHA-isa ashi.

Manipur nung telungpur telok 7 noktangba agienra national security atema lendong bentsür arutsü. Parnok maziukra ozüng alema mapanagi talila inyakstsü aser iba nung civilians o security forces amakba dena lir ta tribunal-isa metedaktsüogo.



West Bengal nung NDRF aser Block Disaster Management ketdangsürtemi Cyclone Remal atema tekümdangtsü osang sangdonga senzüba angur.

**Guwahati, May 26, 2024** (Agencies): Bay of Bengal nungi adokba Cyclone Remal yipru tesashi ka kümogo aser Deobar tzünglu tashii aruba den mopung ayaterm nung ali atongstsü asadangetogo.

Deobar, May 26 aonung West Bengal aser Bangladesh tsüngda tzükümen cyclone Remal atongstsü ta India Meteorological Department (IMD)-i metedaktsü.

Cyclone Remal ya West Bengal aser anameta aliba Bangladesh tsütsü sütsü aser mopung tashi 110 nungi 120 kmph tashi aontsü. IMD-i ashiba agi mopung tashiji 135 kmph tashi atongstsü aser Deobar ayaterm nung ali atongstsü. Iba yipru ajanga West Bengal,

Iba mapang tzünglu kanga aruba den 60 km/h tashi mopung tesashi aontsü akok.

IMD-isa May 28 nü Northeast state tenetprong asoshi Orange Alert sangdongogo aser iba ya tzünglu maneni arutsüba tekümdangtsü lir.

Yipru aontsü aliba dak sendakba nung Tripura weather department-ia May 26 nungi 28 tashi 'orange' alerts sangdongogo.

Deobarnü Prime Minister Narendra Modi-i cyclone Remal atema response & preparedness meyipa reprangshitsü senden ka ayonga menogo.

Külen, Kolkata airport ketdangsürtemi Deobar anüngdang nungi tenzüka ghonda 21 tashi tayimtsü ajak anenogo. Külen, Eastern aser South Eastern railways-ia train aika thiogo.

State ketdangsürtemi tzükümen, talisa Sundarbans and Sagar Island nungi nisung lakh 1.10 shi tangaleni anienogo ta Kolkata nung ketdangsür katashi.

Lendong nung yariteptsü atema state disaster management aser NDRF shia nungi battalion 16 tashi tzükümen mapa lemzüksüogo ta ketdangsürisa ashi.

Bangladesh tzükümen, Tripura aser northeast state kar nungi kanga mejungi kongshitsü aser tzünglu tashii aruba den mopung tesashi aontsü.

May 26 aser 27 anogotem West Bengal tzükümen aliba district tem aser Odisha nungi tzünglu kanga arutsü ta IMD-i ashi.

Kasa mapang Assam aser Meghalaya nunga tzünglu kanga arutsü aser May 27 o 28 anogotem Manipur, Nagaland aser Arunachal Pradesh ama northeast state tem nung tzünglu kanga arutsü ta parnokisa ashi.

IMD-isa May 27 nü Meghalaya, Assam, Tripura aser Mizoram state tem asoshi Red Alert sangdongogo.

saka tenati tim masübalen nungi sen agizükba agi.

Tenati May 20 nü iba mapa inyak aser ibaji May 25 nü putet. Iba dak sendakba nung police-i bushisüngdanga arudang cashier ka aser assistant sales manager ka puogo.

Wokha nung aliba private sector bank tekolak ketdangsüri sen tim mesüi agizükba ken o



2023 küm UPSC ajanga agiba Civil services tatidang nung takok angur Wabong Tongtiliba Longkumer & Watsu Chubala Anar na jala Kongru Imsurenla Longkumer (Ungma) nem DZAOT (Dimapur Zone Ao Officers' Telongjem)-i konang tetushi agütsüba mapang agiba noksa ka yangi angur. Kongru Imsurenla-i UPSC nung takok anguba jenjangji AIR - 774 liasü. Iba sentong ya IMC Hall Dimapur nung May 25, 2024 nü agia liasü.

## Mopungchuket Union Kohima sobaliba asendenshi sentong agi



**Kohima, Monupii/May 26 (TYO):** Tanü putu nung lanu asensor temi asen Aor sobaliba tajungtem angazüktsü nungdaker ta angateta Mopungchuket Senso Telongjem Kohima (MSTK) kubok Culture Society ajanga Sobaliba Asentensi sentong ka May 25, 2024 nü Nepali

Ground, Chandmari colony, Kohima nung agia liasü. Tesayuba aser sentongtemji Yartsüngsang, Moyu, Sobaliba ken: Kimak ken, Yimli ken, Kibalempu ratet, Jayajako, Tasüngdanga (Quiz competition) aser Sobusolem toktepba agia liasü.

Tongtipang sentong kaji,

Zünga tentet 2006-2014 koba Mopungchuket nungeri kümsem zünga (three-years age-group) tenteta aru, ibaji agia liasü.

Iba sentong nung Kohima alir Mopungchuket nunger tantsü tambu, putirtemi anir tsürabur aser lanurtem ajaki sobaliba shisalen sayuba nung shilem agia liasü.

(PDF) dena liasü.

"Kanga sashia khatepba mapang bendanga agütsü mesüra mapu tashi nisung jangjatsü tamakoktsü. Onok Myanmar nung democratic principles tanaben amenoktsü atema rarer, aser ozi opponents indang takum akumtsüber," ta KNA-B ajanga ashi.

Iba operation mapang Myanmar nung mitkar yimsüsür aika onok dangi arua bendanga agütsü/temai adokogo, ta parnoki ashi.

## NSCN-IM-i tiazü mejembitsüla: KNA-B

**Mandalay, Monupii/May 26 (Agencies):** Nagaland nungi Lieutenant Sentilong Jamir asüba atema National Socialist Council of Nagaland-Isak Muivah (NSCN-IM) ajanga onok dak tai tongloktsüba khenyongi magizüker, ta Kuki National Army-Burma (KNA-B)-i ashi.

Iba ama tai tongloktsüba ya tamendak dak maka aser Nagaland nung aliba Ao kin aser Kuki nunger tsüngta mepetmesü adokdakstsü nükjidong nung lir, ta KNA-B ajanga sangdong ka

nung aitsü. Tawa Operation Myothit agiba mapang Lieutenant Sentilong Jamir tepsetba atema NSCN-IM ajanga May 23, 2024 nü asüku lemsatepba nung KNA-B dak tai tongloktsüba sülen iba mangatetep ya tenzüka liasü. KNA-B ajanga ashiba agi, iba operation ya May 7 aser 11, 2024 tsüngta agi aser Democratic Alliance Army lenisüba kubok lungjemer inyakba lir aser yangji KNA-B aser People's Defense Force

## Assam Rifles temi sentong balala ayongzük



**Dimapur, Monupii/May 26 (TYO):** Assam Rifles temi "Meri Life Initiative" sentong kubok Mokokchung nung May 26, 2024 nü donation drive ka ayongzüka liasü.

Iba mapang sepaitem aser civilian tem dang LiFE (Lifestyle for Environment) initiative indang rateta ashi.

LiFE sentong ya libajen wazüka ayutsü nükjidong nung ali rongsen balala kumdanga amshitsü asoshi nübertem nem angatdakstsü nükjidong nung Government of India-i tenzüka liasü.

Iba sentong nung Assam Rifles sepaitem aser kinunger temi donation drive ka ayongzüka Chungtia nung aliba Care and Support (Orphanage) Home nem kidang amshiba osettsü, aben-süoshi, stationary aser chiyongtsü

bendener agüja liasü. Iba drive ajanga Care and Support (Orphanage) Home nung tanur 39 ajangzüka liasü aser Assam Rifles temi mapa tajung inyakba atema nübertem pelaba lemsatep.

Assam Rifles temi May 26, 2024 nü Kiphire district kubok Fakim village nung security senden ka ayongzüka liasü.

Iba senden nung Fakim yimtsüng nungi ketdangsürem den civilian 26 dena liasü. Fakim yimtsüng nung tensa asadanga Assam Rifles aser nübertem tsüngta tesendaktep tajung alitsü nükjidong nung iba senden ya ayongzük.

Iba tesem nung yimjung tesunep alitsü atema yimdaiklir temi security forces den yariteptsü ashi.

Maneni May 25, 2024 nü Assam Rifles temi takum

anema alitsü atema awareness agütsü mech Christian Mission Higher Secondary School, Diphupar nung "Healthy Lifestyle Adoption" onük nung lecture agüja liasü.

Iba sentong nung ketdangsürem den chiyongtsü tajung achitsüba, temang aser tekolok anema alitsü indang jembia liasü.

Meri Life Amplification nung shilem ka ama Assam Rifles temi temang anema alitsü atema mera balala agia awareness agüja arur.

Iba sentong nung Assam Rifles nungi sepaitem, tesayur 14 aser kaketsir 250 dena liasü.

Assam Rifles temi yimjung tesunep aser nübertem jangratema alitsü mech mera balala agiba atema school staff aser kaketsir temi pelaba lemsatep liasü.

## AWUMT 2024-2027 lenitsü atema ketdangpur tasen shim

**Mokokchung, 26th May (TYO):** All Ward Union Mokokchung Town pur 25th May, 2024 nü Federal Council senden Aongza Ki nung takok ngua kaogo aser AWUMT 2024-2027 kümsük lenitsü asoshi ketdangpur itemi; Tir - Lemasashi (Chairman, Alempang Ward), Tatong Tir - T. Ati Mongro (Chairman, Artang Ward), Tongti Zülur - Limanungsang aser Jongpongtemjen nati yokba sangdong ka ajanga metedaktsü.

**Tanü Manipurnung Class 10 exam results sangdongtsü**

**Imphal, Monupii/May 26 (Agencies):** Board of Secondary Education Manipur (BSEM) ajanga High School Leaving Certificate (HSLC) examination 2024 results Hombarnü (May 27, 2024) nü sangdongtsü.

Manipur education commissioner Gyan Prakash-i iba osang ya nikongdang 3:00 ako nung sangdongtsü, koba centres 154 nung March 15 nungi April 8, 2024 tashi tatidang agütsüba kaketshir 37,547 atema grading system tasen dangi melener alitsü.

Takum state cabinet ajanga grading system agizüka liasü. Iba ketdangsürem ashi.

**NPP-i BJP candidate ka disqualification akhanger**

**Itanagar, Monupii/May 26 (Agencies):** Rumgong Assembly nungi BJP MLA candidate kati April 19 nü 22-Molom Dere polling station sapang ta tai tonglokja pa disqualification atema Rumgong Assembly Constituency nung National People's Party (NPP)-i akhanger.

Arunachal Press Club nung May 25, 2024 nü osangbener senden ka nung jembidang, Rumgong A/C nungi NPP candidate indang election agent Karmur Jerang-i ashiba agi, presiding officer-i soittsu merangaka BJP MLA candidate yagi iba polling booth sapanger vote aiben agütsü.

"Pai yamaji inyakba ajanga Representation of the People Act, 1951 aser Indian Constitution indang Section 135A, 324 aser 326 nung aibelenogo. Iba tatalokba ajanga CCTV camera nung tangoka lir agütsü, ta paisa ashi.

**Assam nung Raijor Dal den AJP melokteptsü: Lurinjyoti Gogoi**

**Guwahati, Monupii/May 26 (Agencies):** Assam tejangraba wazüka ayutsü atema regional force tashi tait nüngdaker ta Sivasagar legislator aser Raijor Dal tekolakba Akhil Gogoi-i jembir anogo ka lir, Assam Jatiya Parishad (AJP) lenir Lurinjyoti Gogoi-i parnok lokteptsü bilema mali ta shiog.

Assam nung regional entity tashi tait nüngdaker aser Raijor Dal-i iba atema AJP den sensaksem kaogo, ta Akhil Gogoi-i shia liasü.

"Raijor Dal-i lokteptsü mulunga lir. Iba atema tangbo AJP dak keta lir. Parnoki mulungra, constitution tasen yangluwa political party tasen ka tentettsü aser BJP atema opposition tashi tait ka kumtetsü, aser yangji danga Majakong Ward), Repsem Zülur - Imlinungsang (Secretary, Lijaba Lijen Ward), Senotsü Zülur - M. Yanger Lkr (Secretary, Dilong Ward) aser Kimen - R. Longritemjen Ao (Chairman, Aongza Ward) teloki mulunga shimogo, ta AWUMT tir aser tongti zülur, Limanungsang aser Jongpongtemjen nati yokba sangdong ka ajanga metedaktsü.

Majakong Ward), Repsem Zülur - Imlinungsang (Secretary, Lijaba Lijen Ward), Senotsü Zülur - M. Yanger Lkr (Secretary, Dilong Ward) aser Kimen - R. Longritemjen Ao (Chairman, Aongza Ward) teloki mulunga shimogo, ta AWUMT tir aser tongti zülur, Limanungsang aser Jongpongtemjen nati yokba sangdong ka ajanga metedaktsü.

Marks 91-100 tsüngta angur nem A1 grade agütsü, aser 81-90 marks angur nem A2 agütsü.

Marks 21-30 tsüngta angur nem E1 grade agütsü aser ibai tamakok anguba atema lir aser E2 ya tamakok anguba temaitü alitsü.

Grading system nungya total marks mesüra aggregate scores, divisions mesüra ranks mesayutsü aser pass mesüra fail jenjang dang sayutsü, ta ketdangsürem ashi.

BJP candidate-i vote aiben agütsüba ya CCTV footage nung angur, ta Jerang-i ashi.

24-Yosing Dere polling station nunga BJP worker temi booth capture süa liasü, ta paisa ashi.

"Iba atema onoki ketdangsürem asher agütsü ataa liasü, kechiaser parnoki tatalokba tejangja meteta lir, saka tang tashi parnoki kecha meinyaker," ta pai sasaba ashi.

Election agiba anogo ozüng nung aibelenba atema BJP MLA candidate ya aputsüla, aser Chief Election Commissioner-i vote azüngba anogo matongdang kecha meinyakra NPP-i democratic yimya nung mera agütsü, ta paisa ashi.

party tila tem arua adentsü imlar," ta pai osangbener dang shia liasü.

Ajisüaka Lurinjyoti Gogoi-i party balala lokteptsü melen regional party tem asoshi arok sapang ka atema ang jembia liasü.

Assam nübertem asoshi yimtenren tsütsü teimla tajungba agütsü atema lungjemer nokdakstsü tongtipang aser pei nükjidong tongtetsü asoshi meloktepaka lungjemtsü akok, ta paisa ashi.

"Technical" mech party ana ya melokteptetra Raijor Dal-i regional party tem banner ka kuboki aitdakstsü mech 'United Front' tenzüksü sentong lir, kechiaser linük yimtenren nung regional telungjem nüngdaker, ta Akhil Gogoi-isa shia liasü.



May 26, 2024 nü Sirmaur district nung Lok Sabha election nüboym sentong ka nung Congress lenir Rahul Gandhi, Himachal Pradesh Chief Minister Sukhvinder Singh Sukhu, party leader Rajeev Shukla aser Shimla constituency nungi party candidate, Vinod Sultanpuri nunger tangokba noksa nung angur.

## UCC aser 'One Nation, One Election' mapa kümä benoktsü: Amit Shah

**New Delhi, May 26** mali?, ta asüngdangba ka nung tamangba yimsü nung majemdaki ozüngtem yanglutsü atema benoka liasü, ta Shah-i metedaktsü.

(Agencies): Amongnū Union home minister Amit Shah-i, BJP-i maneni takok ngua sorkar kümra taruba küm pongu tsüngda linük tesem ajaklen Uniform Civil Code (UCC) benoktsü; iba atema küm ponguji teperi, ta metedaktsü.

Interview ka nung jembidang Amit Shah-i, taruba kümsük nung Modi sorkari 'One Nation, One Election' mapa kümä benoktsü atema inyaktsü, kechiyong linük nung khenyongi election ajak agitsü atema mapang tongogo, ta ashi.

Paisa, mapang ka nung dang election agiba ajanga senotsü aika kümzüksü, ta ashi.

Linük nung kanga tatsük mongpu nung election agir, ajisüaka tarutsü nungbo asükwa mapang nung ang election agitsü takoktsü lenmang lir

Shah-i, BJP-i Uttarakhand state nungbo UCC benokogo, kaketsirtem-a sodi mapang. Iba ya ajanga timtema aika aser Centre kübok lir, ta metedaktsü.

Paisa, UCC atema o entepstsüla aser yimsü lenirtem aser stakeholders den jembia inyaktsüji tongtibang aser ozüng meyangludang loktiliba, legal aser judicial tsütsülen nungi tangatetba balala asadangtsü nüngdaker, ta metedaktsü.

Lok Sabha election atema sayaba BJP manifesto nunga party-i linük nung UCC benoktsü, kechiyong ibaj medenibo tetsür-tebur kasa züngshiba nükjidong mataloktsü, ta metedaktsü.

Constituent assembly-i UCC densema renemba mapang nung K M Munshi, Rajendra Babu aser Ambedkar nunger ama shisashirtemi secular linük

## Delhi hospital ka nung kinütanur 7 asü; hospital kibur jenadokogo

**New Delhi, May 26** lendong atalokba sülen kibur, Naveen Kichi jenshia senzüdar. Iba hospital nungjagi kinü tanur 12 bo kümzükteta liasü saka tia maka tanur tenetbo süogo, ta Delhi Fire Department Director, Atul Garg-i metedaktsü.

Ano kinü tanur pongubo tanga hospital ka nung yaridar, ta paisa metedaktsü.

Osangbenertem den jembidang Atul Garg-i, iba hospital ket nung No-Objection Certificate (NOC) mali asütsü akok, ta metedaktsü.

Atul Garg-isa, miji baby centre nung tama adok, anungji anasa alirtem jena oadoker liasü,

"Kümzükba maparen inyakdang oxygen cylinders aika apok aser onoka pei taküm kümzüksü aküm. Onoki tanurtem kümzükba maparen tenzük, ajisüaka onoki parnok ajakbo mekümzüktet," ta paisa metedaktsü.

National Commission for Protection of Child Rights Chairperson (NCPCR) nungi Priyank Kanoongo-i, commission-i iba osang angazükogo; NCPCR team kati iba hospital semdanga iba tatalokba bushisüngdangtsü, ta metedaktsü.

Raut-isa, Uttar Pradesh nung BJP-i Lok Sabha menden 30 nung tamakok angutsü, kechiyong Shah-i maneni takok ngura Chief Minister Yogi Adityanath pa menden nungi agentsü ta osang temai adokogo, ta metedaktsü.

Chief Minister Eknath Shinde-i NCP plenir Ajit Pawar'er candidate shinga takok mengudaktsü atema inyak aser Shinde-i Lok Sabha constituency shia nung sen

## Rajasthan kübok Phalodi nung temperature 51°C tashi atu

**New Delhi, Monupii/May 26** (Agencies): Amongnū (May 26) India shilem tulubaka kanga tatsük liasü aser Rajasthan kübok Phalodi nung maximum temperature 51 degrees Celsius tashi atu, ta India Meteorological Department (IMD)-i metedaktsü.

Osangbener den jembidang IMD nung senior scientist, Naresh Kumar-i, "West Rajasthan kübok Phalodi nung maximum temperature 51 degrees Celsius tashi liasü," ta metedaktsü.

"Taruba anogo ana-asem tashi Rajasthan nung maneni kanga tatsük asütsü aser onoki Red Alert metedaktsü. Iba sülen temperature tanem-tanema ajema akümtsü. Haryana nunga onoki Red Alert sangdongogo. Punjab nung anogo ana atema orange alert sangdongogo iba sülen red alert sangdongtsü," ta paisa metedaktsü.

IMD scientist-i, taruba anogo 4-5 tashi Delhi nung kanga tatsük asütsü, ta metedaktsü.



May 26, 2024 nü Mau District nung Lok Sabha election nüboym sentong ka nung Ato kilonser, Narendra Modi agizükdang tangokba noksa nung angur.

## PM Modi aser Shah-i Gadkari tamakok ngudaktsütsü atema inyak: Raut

**Mumbai, May 26** crore 25-30 indok, ta ashi.

(Agencies): Shiv Sena lenir, Sanjay Raut-i, Ato kilonser Narendra Modi, Union Home Minister Amit Shah aser BJP lenir, Devendra Fadnavis nungeri longjemer Union Minister Nitin Gadkari Lok Sabha election nung tamakok ngudaktsütsü atema inyak, ta metedaktsü.

Amongnū Shiv Sena (UBT) lenir Sanjay Raut-i ocet ka ajanga Modi, Shah aser Maharashtra Deputy Chief Minister Devendra Fadnavis nungeri longjemer Union Minister Nitin Gadkari Nagpur Lok Sabha menden nung tamakok ngudaktsütsü atema inyak, ta tai tongloksü.

Raut-isa, Uttar Pradesh nung BJP-i Lok Sabha menden 30 nung tamakok angutsü, kechiyong Shah-i maneni takok ngura Chief Minister Yogi Adityanath pa menden nungi agentsü ta osang temai adokogo, ta metedaktsü.

Chief Minister Eknath Shinde-i NCP plenir Ajit Pawar'er candidate shinga takok mengudaktsü atema inyak aser Shinde-i Lok Sabha constituency shia nung sen

Amongnū Raut-i party indang Saamna osangkaket nung Rokthok tapak ajanga, Fadnavis-i memelungi Union Minister Gadkari atema nübo yimtsü, kechiyong pai Union minister ji tamakok mengudaktsütsü ta meteta liasü, ta ashi.

"Nagpur nung RSS nisungtemi, Gadkari tamakok ngudaktsütsü atema Fadnavis-i Opposition yari ta jungkai adoka jembir," ta Raut-i ashi.

"Gadkari aser Yogi (Adityanath) nati kasa tensa ajurur. Adityanath pusemertem yimyimji, Yogi kümzüksü süra Modi agentsüla. North nungi Yogi aser pa pusemertem Modi aser Shah na tamakok ngudaktsütsü atema telemtetba agiogo," ta Raut-i ashi.

Raut-isa, "Ato kilonser Modi aser Union Home Minister Amit Shah nati tamakok angutsü aser par sorkar chireptsü. INDIA teloktepi menden 300 shi angutsü. Maharashtra nung Modi-Shah teloki state nung Lok Sabha menden 48 nungi menden 32 nung tamakok angutsü," ta ashi.



Kolkata, May 26, 2024: Cyclone Remal tzüymküm atongtsü mapang ana nung Ia Kolkata nung aliba Netaji Subhas Chandra Bose International Airport nung security sepaitem aliba noksa nung angur. Cyclone Remal agi kongshitsü mapang ana nung Ia Kolkata airport ketcangsertemi Amongnū anüngdang 12:00 ako nungi tenzuka ghonda 21 tayimtsü service malitsü metedaktsü.



# TIR YIMYIM

## YIMOBILEM (EDITORIAL)

DIMAPUR TENTONÜ, MAY (MONUPII) 27, 2024

### Light apayua atsüktsüla

**N**agaland nung perinütsüka ser nung kangasa nüngdak ka meperitetbaji electric light ya asütsü. Aji oda, tanübo electric tashi ya tesangwa atema dang masü saka tzü atsütetba aser soruchiokba mapatem nungi shir osettsüset tapu ajak ya industry aser factory nung light agi yanglubatem dang asünungji, item nüngdaktem inyaktsü atema Nagaland nungbo kanga timatemer aser maparen aika nung tamakok aser takoksa ngudagi. Ano, talisa tang ama anü kanga tatsük apudang balaka light ya ki aser mapa inyakdak ajak nung temekong agitsü asoshi kanga nüngdaker. Aji oda, tang ama nüngdak tali tali akümdang, nüngdakji meperiba meperiba kümadoker, anungji asenok ajaki asenoksasa asenok timmatemtsüa inyaktsüba mapa kaji asen ket nung kechi aka, aji moyaka mesüra apayua agitsüla. Iba tangatetba nung asenoki tang ama tatsük mapang nung asen kidang aser mapa inyakdak anüngdang aser aonung menüngdakba mapang light tsükloka mayutsüla aser akok tashi aonunga tesangwa kisüng asoshibo light bulb aika metsüklonga ngura ojang ta asüba tangatetba nung light tashi apayua amshiba agi asenoki meteta aser memeteti tajangzük aika angutsü. Aji oda, kidang aser mapa inyakdak light bulb-bo aika enoka lir ser nung asenoki light bulb ajakbo metsükloki light tashi anüngzüka yutsüba agi light bill aika adoktsüba nungia kümzüktsü aser kilong aser kimalen mopung tatsükba akümtsüba nungia nokdangtsü aser tongtibang kaji, asenok dangi light tashi yokba transformer raksatsüba timtem aser takoksa nungia kümzüktsü. Item tajangzüktemji angutsüba ser nung asenoki aiben merajemer aser meblemdangi light tashi ya agir magima angati angur ama anüngdanga dena light tsükloka ayur aser nisung mali ser nung fan aser air conditioner tsükloka yutsür. Iba lagi asenok akaba light tashi tera agi asenok ajak peria agitsü melen asenoki mapayui mashimashi amshiba agi asenok talila timtem ajurutsüa aiben transformer raksar, light bill tali adoker aser alima tatsükba kümduktsür. Itemji asenoki meteta kodang electric light tashi ya amshidir, asenok akaba tera agi asenok tang nüngdakbo peria amshittetsü. Idangjibo, light bill tajemba adoktsüba yutsür tang light opet oa aliba ya khena maotsü, transformer-a meraksatsü aser kilong aser kima temekongba akümtsü. Ashiko, asenok aikati light tashi mapayui agiba ya light bill magütsüi auyaa agiba ajanga asütsüa akok, anungji auyabajji anentsüla aser asena asen nüngdak yari light tashi yabo shitak department ajanga alia agitsüla. Auyaba mapa ya majung saka ano aseni auyaba ajanga tangar timtemdaktsüra ibajisa majungba asütsü. Aji oda, asenokbo sensaker asünungji tangar takar state aser kibongtem jilu ajizüka light tashi nüngdak makaba nung dena tapayu mali amshitsüba asenoksasa asenok suseta asütsü sentong yanglur amai asütsü. Asenok ama sensaker kibong nung chiyongtsü tera akaba agi kinunger ajak peria chiyongtsüa apayua amshiba ama, asenok akaba light tashi tera agi asenok peribø amshittetsüa asenok ajaki tangatetba nung inyaktetra tangar takar pei akaba agi meperitet timtema alidang asenokbo tera akaba agi takar kuma alitsü. Iba ama mapa yabo ozüng agi kangshia inyaktsüba mapa ka masü saka peisasa tangatetba agi inyaktsüba senso ka shilem lir. Iba tangatetba nung asenoki teti kati ka ajungshitepa 'nie tama inyak tenzüktsü' ta asüba temulungtetba nung asenoki asen kidang aser asenok mapa inyakdak inyaka sayura, memeteti asen den külem alirtema asen jilu ajizüka benshi tenzüktsü. Aji oda, alima nung ya asen alidak aseni asensasa timtem tera agia ajak ajungtsü bilema inyakba agi, tangar dangbo ano asenokang tajangzük tuluba angutsü. Ibají bilema tanü nungi asenok ajaki electric light tashi ya kanga apayua aser moyaka amshidi.

# OLEMSABANG

## Tanü Aor arogotem nung telok telemsa aika lir

~ L. Kika Pongener.

(Yashi adok nungi...)

**Khrista telok** : Shirnoki Yisu Khristaji kü kümtdakba aser Kibur ta tebang agi nangzüker, temulong nung amanger aser tzü nung baptir, aser Yisu Khrista dak chichia amanga anidak parnokji Khrista telokji liasü. Ajisuaka, ashiko, Korint arogo nungji iba telok yabo parnok aika masü teshimtet ishika dang (Minority) liasü sudi ta bilemer.

Tanü asen Aor lir arogotem tia asadanga reprangdangra, arogo teimba ka nung sensaker, tilar aser mashi-memetetertembo jenjang kecha maka, arogo sentong, inyakyim aser mapatong aika nung kecha shilem agia matadaktsüba/mezungokba tia ka nung lir. Atangji, lir arogo aika nung sensaker, tilar aser mashi-memetetertembo tenzükba mapa kecha nunga meshimba jenjang ka nung lir. Sensaker, tilar, mashi-memetetertembo sentong kecha nunga mamshiba jenjang ka nung lir. Iba telok ya Korint arogo nung Paul telokji mesuka lir.

Ano tanga telok kaji, tashitemeter, tulur aser takar (Elite Society) item telok asütsü. Tesasatsüka, tanü Aor arogo teimba ka nung tashitemeter, tulur aser takartemi arogo inyakyim, tenzükba mapatong aser arogo sentong ajunga ajebanger, parnoki mulongba nung dang arogoji anitsü aser attsür aotsü merangba tensa tia ka agi menepogo. Iba telok yagi arogo senpong melemdaktsür, arogo tashi-ita noktakdaktsür, arogo nungiter aser arogo terenlok mapa nung ajungkettsür. Yongji, arogo nung parnokji kibur kümduktsür, parnoki mulongba nung arogo inyakyim aser sentong ajunga anir aotsüa akümer. Arogo nung tongti-tenzüktermi anir arogopurtem ajungai parnokji kümduktsüa akümer. Iba telok ya Korint arogo nung Apolo telokji mesuka lir ta bilemer.

Ano telok tanga ka, sobaliba aser tejen yimsu ozüng nung akang-akanga ammetba telok, arogo-ji alima sobaliba yimsu ozüng nung ajemdaker, iba yayim nungji aotsü/ayutsü/anitsü merangba telok. Arogo inyakyim ajunga aser 'Deacon Menden'-ja yimsusuba bangdak 'Putu menden' yayim nung anitsü/ayutsü merangba telok. Iba telok nung ya teimba ka yimdak yimküm-yimlir aser tata-tainer (Pioneer)-tem lir. Iba telok yagia arogo inyakyim aser sentong ajungaji parnoki mulongba nung anitsü meranger. Iba telok ya Korint arogo nung Peter telokji mesuka lir.

Arogo ajak nung telok tilatibaji Khrista telok ya asütsü...Arogopurtem rongnug tekümtet tejangja akaba aser chichia Yisu sulen anidaka amangertem. Ashiko, iba telok yabo arogo ajak nung tajemtiba/ishiba (Minority) telokji asütsü. Tanü Aor lir arogotem ajunga nung chichiba tekümtet tejangja akaba tamangertem agi anung-akonga lir.

Tanü Aor lir arogo teimba ka Korint arogo mesuka, arogo telung nung telok-telok lemsar lir. Toklang tenzükter tsüngda nunga meputep agi sunger, parnok sulen anidaka arogopurtema telok balala lemsar lir. Ano toklang tenzükter aser laishirtemi Yihuda nunger Farise-tem amai...Onok ya tesayur, anungji onoki dang sayutsüla ta asüba, iba tangatetba nungi pilatsüla. Toklang tenzükterem aser laishirtem...Nenoka tangar nungi angazüksü karbo lir-ko... Anungji mapang kar nungpo anisungzüka mener tangar nungia angazüksüla...Menden nunga asen amen, temoa, tetsüa, tereta ajak asen achitsü ta asüba tangatetba yabo endoktsüla. Alima ya kangasa tejakleni aor, nuburtema ajunga tashitemeter dang, anungji item ajungaji liromedema anitsübaj arogo nung lennirtemi kanga junga angatettsüla.

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngeri angateta agitsü mepishir



May 25-26, 2024 anogotem nung Jalukie B. Baptist Church nung Liangmai Theological Fellowship pur 32buba senden amenba sülen tangokba noksa nung angur. Anogo ananü senden nung Liangmai theological Fellowship (LTF)-i Liangmai Baptist Association (LBA) nung mission secretary, Lungsunibo Newmai Tir shima pa leniba nung office ketdangpur tasen shimogo.

## Church of England-i election atema sarasademtsü ayongzüker

**May 26, 2024:** Church of England (CoE) nung putirtemi i July 4 nü agitsü aliba general election atema sarasademtsü aser election nung shilem agitsü ayongzük.

Archbishop of Canterbury, Justin Welby aser Archbishop of York, Stephen Cottrell nati Khristantem dang mapang shiteta election atema sarsadembra den külemei election nüboyimba mapang nung akhümtsübuteptsü aser ochishia inyaktsü ayongzük.

Election jakdang Church of England-i '#PrayYourPart' campaign ayongzüka nübertem dang election nung shilem agitsü ajungshi.

Iba campaign kübok Church of England nung putirtemi anogo shia srasademtsü atema Lai tekongtem onük lemsatepa lir. Itemji booklet, app aser audio nung dang masü saka social media aser emails ajanga-a lemsatepogo.

Tongti putir anati, "Taruba general election ya asen linük nung taküm atema kanga

tongtibang mapang ka lir, koba ajanga asenoki shimetetba lenirtemi asen tarutsü jenang alangtetsü aser tarutsü putu aika kongshitsü. Tamangba yimsü balala amangertem

"Asenoki asen linük aser alima tesem ajaklen tayongzükba jenti ajangshir; rara aser yimjung nungi sensak tia aser tim masüba jenti lir; item atemaji shisadangtsüla. Item ama tasüngdangba jenti aliba

mapang nung Khristan ka ama asenoki Tsüngrem dangi meypa sarasademtsüla," ta tenatisa ayongzük.

"Iba ama o entepba mapang nung asenoki kati ka akhümtsüpütepa temeim sayutsüla," ta tenatisa ayongzük.

Ano külen Khristan charity telok, CARE-i Khristantem election nung shilem agiba dak sendakba nung yariteptsü nükjidong nung website tasen

ka lapokogo. Iba website nung sarasadem onük aser Miriam Cates o Tim Farron na densema Khristian MP tem interview agiba densema lir.

CARE CEO, Ross Hendry-i, "Taruba hopta trok tsüngda yimtenren party temi tongtibang election onüktem sangdongtsü aser manifesto sayatsü. Election ya alima atema metzü aser tesangwa asütsü asoshi Khristantem atema maongka tulu lir. Iba ya maongka tulu aser democracy linük ka nung aliba ya maongka tajung," ta metedaktsü.

Paisa, "1 Timoti 2:1-2 nung shia aliba ama ni nisung ajak dang Chubatem aser ketdangsertem atema sarasademtsü ayongzüker," ta metedaktsü.

"Politics ajak madak Yisuji Chuba. Westminister tesem ajaklen metzü aser tesangwa asütsü atema Tsüngremi Khristan MP tem tasen shimettsü asoshi asenoki sarasademi," ta paisa ayongzük.

## UP nung anti-conversion ozüng kübok Khristan 70 shi jail nung lir

**May 26, 2024:** Uttar Pradesh

Pastor Bishnoi ya Uttar Pradesh kübok Varanasi yimti nung alir. Iba yimti ya Hindu nunger atema kanga temeshi yimti ka lir.

Yaküm December ita nung UP kübok anasatepa aliba district ana nung pastor aser tamanger 50 dak tema pua liasü. Parnok teimbaka anogo ka-ana tsüngda chiok saka ketdangsertemi pastor 9 bo jail nung puoka liasü.

Iba mapang nungji Bishnoi den Khristan lawyer temi ita ka jungnua ken o jembija aruba sülen pastor 9 nungjagi pastor 8 bo chioka liasü.

"Jail balala nungi nisung 46 chioktsü atema inyakba lawyer tem den ni yaritepa aruogo. Ano aika tepoukdak lir. Parnok 70 shi jail nung lir," ta paisa metedaktsü.

Bishnoi-is, India nung UP ya state tulutiba aser nütsüng teimtiba aliba state lir, anungji jail nung Khristantem kwi aliar tejanga meshitetsü, ta ashi.

nung anti conversion ozüng- Uttar Pradesh Prohibition of Unlawful Religious Conversion Ordinance of 2020 kübok

Khristan 70 jungnua tang tashi jail nung timtemdar, kechiyong ketdangsertemi parnok nem bail magütsür, ta International Christian Concern (ICC)-i metedaktsü.

Uttar Pradesh nung pua aliba Khristantem aika chiokba maparen nung Pastor Bishnoi-i yaritepa aruogo. Osangbener den jembidang pastor-i, Khristantem nem bail magütsübjai inyakyim kar metembangba agi lir ta parnoki ashir, ta metedaktsü.

"Indian Parliament nung Lower House (Lok Sabha) atema elections sangdongba sülen nungi tenzüka bail atema temepishiba ken otem angadangba kanga menor. Pastor 70 shi tang tashi jail nung lir ta ni shitere," ta Pastor Bishnoi-i metedaktsü.

## Chhattisgarh nung tamanger tasen ka par kinüngertemi tepset

**May 26, 2024:** Chhattisgarh state nung tawa Khristan yimsü agizüker ka pa teko densema kinüngertemi lokti ayongsemer tepset, ta International Christian Concern (ICC)-i metedaktsü.

Tawa arrshi küm 22, Kosa Kawasi aser pa kinüngtsü nati Hindu yimsü toktsür Khristan yimsü agizüka liasü. Iba sülen mapang tatsüka tsüngda yimertemi tena yimdak nungi meindoktsü merang saka

makok, ibayongji loktii Kawasi teko kotari agi yiruja liasü.

Yimdklirtem jagi Kosa Kawasi aser pa kinüngtsü na dang Khristan yimsü tokjang, ta shia amokmerenba sülen Kawasi-i sorkar ketdangsertem nem iba osangji metedakja liasü.

Ketdangsertemi tiyongtsüi aita yaritsü ta pai bilema liasü, ajisüaka May 4 nü lokti kati pa tepset. Pa

bushisüngdangba sülen, pa tepsetba ya yimsü tsütsülen nungi masü saka kimong tsütsü mangatettep adoka tepsetba lir, ta metedaktsü.

Kawasi-i Hindu yimsü dangi meyiptü memelungba agi teko-i pa anema apusoa lokti ayongsemer pa tepset. Kimong tsütsülen nungi mangatettep ajanga Kawasa tepset, ta jembibaji tongti kulib masü, ta tenük kuli alirtemi metedaktsü.

Uttar Pradesh nung pua aliba Khristantem aika chiokba maparen nung Pastor Bishnoi-i yaritepa aruogo. Osangbener den jembidang pastor-i, Khristantem nem bail magütsübjai inyakyim kar metembangba agi lir ta parnoki ashir, ta metedaktsü.

"Indian Parliament nung Lower House (Lok Sabha) atema elections sangdongba sülen nungi tenzüka bail atema temepishiba ken otem angadangba kanga menor. Pastor 70 shi tang tashi jail nung lir," ta Paisa Bishnoi-i metedaktsü.

## Kachin state nung sepaitemi Arogo lenirtem aser pastor tem aika apu

**May 26, 2024:** Myanmar kübok Kachin state nung sepaitemi mita aoba mapang Khristan lenirtem, pastor tem aser lanurtem aika puogo, ta International Christian Concern (ICC)-i metedaktsü.

Tang Myanmar nung lisopur telok balala longjemer sepaitemi yimsüuba anema

rara; ajioda Arogo lenirtemi lisopur teloktem yarir, ta tai tonglokja sepaitemi apu.

Osang angazükba agi, sepaitemi yimdklir 200 dak tema pua school ka nung parnok amokmerena asüngdangyaba sülen ghonda 9 shi lir ang chioka liasü. Tawa Kachin state nung

sepaitemi pastor ana tepsetogo aser Khristan aika apuba sülen züka amokmerenogo.

2020 Burmese Population & Housing Census Report ajanga ashiba agi, nütsüng million 1.6 aliba Kachin state nung nütsüng shilem 34 bo Khristantem lir.

## ANOGO ABEN TSÜNGREM DEN

### Tsüngrem o angazüka ayutsüla

"Ni na anema temenen memenatsü ne o kü mulung nung rizunga lir"

(T. Ken 119: 11)

Tanurtem aser lanurtem asoshi temulung agi angazüktsüba temela. Tanur asüdang school nung tebendenba ongko temulung agi angazükba tambur kumer bilemteter. Lanuwa mapang angazükbaji süngdong tajem nung kojal (nail) angenlokba ama lir. John Newton ken zülur ka liasü aser pajisa ano Anglican pastor ka liasü. Alar shishilembaba anendaktsüba nung pai shilema agia liasü. "Tesüngmangtsü Taochiji" pa ken lir. Kütsü temulung agi Laishiba tekong, tapu, ken, sangro aser Baptiba lesson aika angazüktsüba. Kodang Kibubai kütenük lapoktsü, ni itemji bilemteta tajangzük tulu angu ta kuli agütsü. Tanü tanur kwikati pei tetsü kuli yamaji agütsüttetsü? Tetsütem kwikati pei tanuri yamaji kuli agütsütsüsa tanü inyakdar?

Tanurtem lanuwa mapang, Lai o temulung agi angazüktsüba temela senti lir. Tanur sayua indaktsüba mapang tetsü kati mazüngi sayutsüla. Lai küm shia Lai tekong 300 tema angazüktsura aji rongsen kodaka? Ne mulung tepela agi sünga alitsü. Shi jangraba nungi jena aotsü aser Satan madak takok angutsü temela asütsü (T. Ken 119:9,11; 1 Yh 2:14). Dr. Billy Graham-i asenok dang ashir, "Yosefi tarutsü aliba ayawara nungi kümzüksü asoshi peria akaba mapang, tsük bendena ayuba ama asenoki Tsüngrem o ochibaji takok tashi temulung nung angazüka ayutsula, süra kodang asenok dangi timtem arudir aremzüktetsü."

**AO OSHI ANGAZÜKDAK:**  
**TANÜ ANGAZÜKTSÜBA OJANG**
**Süngzük**

(v) süngjem aküm (rest, calm down)

\* Medemertem aruba agi kü mulung süngzük

**Sünoksübang**

(v) tebangmung mangu, tsüngsü maka (untraceable)

\* Auer mapa sünoksübang maka aküm

**OLONG PAITEP # 6799**

1		2		3		4	
		5		6		7	
8							
		9					
10							
11				12			
		13		14			
15				16			

**TIPLÉN**

- |  |       |
|--|-------|
| 1. Ahenzükdk ki                              | - (5) |
| 3. Asür mangyimba                            | - (5) |
| 5. Temulung nung shisadang                   | - (5) |
| 8. T ___ lu                                  | - (3) |
| 10. Takdang temalen                          | - (9) |
| 11. Tesa ___ a                               | - (3) |
| 13. Ajungbena temulungjang tongtonglatsü atu | - (5) |
| 15. Tejen lai nung tesayur                   | - (5) |
| 16. Tsüngsak-mopung                          | - (5) |

**LANGTSÜNGLEN**

- |                             |       |
|-----------------------------|-------|
| 1. Reprangdaktsü            | - (4) |
| 2. ___ ur                   | - (3) |
| 4. Kiojen yangludak         | - (6) |
| 6. _____ ait                | - (7) |
| 7. Nagaland nung ayong ka   | - (5) |
| 9. Küm kasa purtem          | - (5) |
| 10. Tetsüng tajemetdak      | - (6) |
| 12. _____ adenshi           | - (4) |
| 14. Tsünüsénbongtsü adokdak | - (3) |

**OLONG PAITEP # 6798TELANGZÜBA****TIPLÉN :**

- |                              |                               |
|------------------------------|-------------------------------|
| 1. Kasa, 6. Rangben,         | 1. Khu, 2. Sujak, 3. Onük,    |
| 7. Mait, 9. Poktet, 11. Ati, | 4. Oba, 5. Anü, 6. Ratet,     |
| 13. Atasa, 16. Rür,          | 7. Mozü, 8. Ita, 10. Tar,     |
| 17. Rajang, 20. Lanu,        | 12. Tinu, 14. Salem, 15. Aja, |
| 24. Nüngjem, 25. Süra.       | 18. Anünü, 19. Taju, 21. Ano, |
|                              | 22. Onü, 23. Kua.             |

**LANGTSÜNGLEN :**

- |                               |  |
|-------------------------------|--|
| 1. Khu, 2. Sujak, 3. Onük,    |  |
| 4. Oba, 5. Anü, 6. Ratet,     |  |
| 7. Mozü, 8. Ita, 10. Tar,     |  |
| 12. Tinu, 14. Salem, 15. Aja, |  |
| 18. Anünü, 19. Taju, 21. Ano, |  |
| 22. Onü, 23. Kua.             |  |

**NAI-A YA METETTER MA**

Kenya tsür Beatrice Chebet-i May 25, 2024 nü women's 10,000 metres world record ajatetogo.

Eugene Diamond League meet nung Chebet-i minute 28 second 54.14 nung taoba otsü ajateta liasü.

Küm asem tejakdang Ethiopia tsür Letesenbet Gidey-i Paris Olympics nung otsü tasen yangluteta liasü saka Chebet-i second 7 agi la jatetogo.



India aser France tsüngda Joint Military Exercise 'Shakti' 7 buba May 26, 2024 nü tembangdang agiba noksa ka angur. Iba training ya Umroi, Meghalaya nung Foreign Training Node nung agi aser linük anaprong nungi Tri-Service delegation group ajanga tatembangba shilem agia liasü. May 13 nungi May 26, 2024 tashi agiba training ya Indian aser French Armed Forces tsüngda joint tactical operations tajungba akümtsü atema ayonga agiogo.

**Mizoram police-i Syria nungi Mizo tsür 3 anir arutsü meranger****Aizawl, May 26, 2024** sangokja liasü.

**(Agencies):** Mizoram police-i Syria nungi tetsür asem anir arutsü atema mapa inyakdar. Par asem ya November 2022 nung kidang yariteptsü atema aoba liasü.

Syria nung Indian Embassy ajanga Mizoram sorkar dang par asem timtemba osang

May 19 nü Indian Embassy

aser Syrian Ministry of Foreign Affairs senden amenba sülen Mizo tsürtem ayuba kiburtem nem legal notice ka agütsü.

Syrian placement agency-i mezungbo tetsür shia dang parnok anir aoba atema \$2,500 meshia liasü. Iba ya contract

agreement nung lateta aliba onük ka lir saka Indian Embassy aser Syrian ketcangsürtem tiyongsü aiba sülen agency-i sen magitsü mulungogo.

Mizoram chief minister Lalduhoma aser home minister K Sapdanga nati iba teblemtsü atema mapa inyakdar.

**KCP-N-i nisung shibelenner ka dak injang khaloktsü****Imphal, May 26, 2024** shibelenba maparen dak

**(Agencies):** Manipur kubok Bishnupur district nung telungpurtemi arishi küm 23 tain ka yirutsü.

Deobarnü telungpur telok kati iba tatalokba atema tenüng agiba metedaktsüogo.

Moirang Police-i iba tatalokba atema bushisüngdanger aser parnoki ashiba agi Imphal aser Bengaluru tsüngda nisung

Kangleipak Communist Party - Nongdrenkhomba (KCP-N)-i pa dak injang khaloktsü ta tanü metedaktsü.

KCP-N-i Chandrakumar ya Bishnupur nung osangbener tsüngdangi anir ao aser idangji pai nisung shibelenba mapa inyakba nangzüka liasü.

Manipur police-ia iba tatalokba ya nisung shibelenba atema liasü ta bushitetba osang metedaktsüogo.

**Auertemi Maa Mahamya temple nungi senti osettem auya****Guwahati, May 26, 2024** auertem aru. Iba ya CCTV

**(Agencies):** Deobarnü camera system nung Kokrajhar, Assam nung menüngoka lir.

Auertemi Maa Mahamaya temple nungi senti osettem auya.

Gossaigaon town nung aliba Kachugaon nung iba tekülem ki

Tekülem kidang inyaker staff-i ashiba agi auertemi Rs 10 lakh shi alang hon aser taribi osettem auya a bener ao.

Police-i CCTV footage asadangdar aser iba nung

nisung asem sayua lir.

CCTV footage ajanga nisung ka indang tejak angur aser pa indang maitsü jangjatepdar ta police-isa ashi.

CCTV footage nung auer kati süngyanglu tsüngdang temoatsü meshiba sülen senti osettem auya bener aoer.



Assam chief secretary Ravi Kota-i Guwahati nung MJI Perfumes lapokba sentong nung jembidang agiba noksa ka angur. MJI Perfumes ya Assam nung mezüngbuba licensed agarwood perfume & retail store lir. Ravi Kota-i agarwood teinyaktsü wadang tulu inyaktsü sadema aliba osang lemsatedang Assam nung süngjok aser totzü sülen agarwood asütsü ta ashi. Assam nung agarwood tsünütsü kanga tajung aser global markets, talisa Middle East nung nung agarwood janga sapur ta Assam chief secretary-isa ashi.

## Papua New Guinea anentsüh lendong nungnisung 670 dak temasür alitsü: UN



**Port Moresby, Monupii/May 26 (Agencies):** International Organization for Migration-i, Papua New Guinea (PNG) nung anentsü tulu ka aluba nung asür 670 dak tema asütsü ta asatetba metedaktsüogo.

Papua New Guinea nung United Nations agency indag mission tekolakba Serhan Aktoprak-i Deobarnü ashiba agi, Yambali yimtsüng aser Enga provincial kettangsürtemi asadangba sülen Hokolbarnü anentsüh lendong nung ki 150 dak tema anenbangogo aser asürtem timba akümtsü ta asatetogo.

Ali agi nisung 670 anenbanger alitsü ta parnoki asatetogo," ta Aktoprak-i ashi.

"Ali maneni arakzüdar aser tzüa yimdar aser iba ajanga tekümzükba maparen nung sendaka alir ajak lendong bang nung toktsür," ta Aktoprak-i ashi, shiba linük yimtiba Port Moresby nung amendaker lir.

Local kettangsürtemi Hokolbarnü asürtem ya 100 dak tema asütsü ta asateter liasü. Deobarnü tashi nung tasümgang pongu aser tetsüng ka dang nguteter liasü aser kasa mapang nung tanur ka densema nisung tenet temang anepalua liasü.

Kasa mapang nung emergency responder temi lendong nungi jenbortem tekümzükba tesem balalai aninogo. Anentsüh aluba tesem nung ali tashi maitba aser linük kubok iba tesem nung kin o kin tsüngda raratep adoker aliba ajanga tekümzükba maparen inyaktsü mesademi akümer.

Maneni lenmang raksatokba ajanga item tesemi aotsü tetsükdaktsü adoker, ta PNG nung CARE Australia humanitarian group züngsem Justine McMahon-i ashi.

"Ali kanga tashi mait aser iba ajanga tekümzükertem tetsükdaktsü adoker. Lenmang tongtiba meter 200 shi

anenbangogo aser iba ajanga teyari agütsütsü asoshi tetsükdaktsü adoker," ta lai Al Jazeera dang ashi.

Ali nongshitsü atema equipment tulutem ano anentsüh aluba tesem tonga mao, koba linük yimtiba Port Moresby nungi northwest tsütsü km 600 pilar lir.

Teyari balala agütsüba agency temi ashiba agi, iba lendong ajanga yimtsüng nung kiset shiruru, atsü aser tzübo ajak meshi meshia samatsüogo.

Sorkar kettangsürtemi evacuation centre tem amenoktsü meanga arudar.

Anentsüh agi highway nembanger aliba ajanga tetsükdaktsü adokba den lenmang tomlen yimtsüngka nung kin tem tsüngda raratep adokba ajanga oset balala belenshitsü tetsükdaktsü adoker aser PNG sepaitemi convoy tem nem security agütsüdar.

asoshi linük meimertem shimsü.

Burkina Faso yimtiba Ouagadougou nung iba senden amendang civil society nungi teshimtet nisungtem, security aser defence forces aser transitional assembly nungi ozung yanglurtem dena liasü, saka political party aikati shilem magi.

Election agitsü menuba ajanga Western aser Central Africa nung democracy sama aotsü ta aikati arendaka bileyer, kong küm pezü tsüngta mitkar tashi amshia sorkar atsüngdokba linük ti nung ataloka lir.

Burkina Faso nung telungpur telok temi 2015 küm nungi sorkar anema nokdaka arur aser iba mapang nisung meyirijang aika tepset aser million aika pei ki yutsür tesem balala nung jenoka lir. Mitkar sorkari linük nung iba tayongzükbatem mazükter.

Charter tasenba nungya assembly nung mena aliba traditional party tem nungi züngsemtem asoshi quota tem mamshitsü ta shia lir. Iba melena deputy tem shimsü

## Gaza-i aid trucks tali yoktsü imlar

**Cairo, Monupii/May 26 (Agencies):** Deobarnü Israel-i Rafah crossing majangi aid trucks 200 shi Karem Shalom ajanga Gaza-i yoktsür renemshir.

Iba tesem ya ajanga khen atema Gaza-i teyari yoktsü asoshi US Tir Joe Biden aser Egypt Tir Abdel Fattah al-Sisi tsüngta Hokulbarnü tezüngzüktep ka agiba sülen iba osang ya angashir.

Egypt Red Crescent nungi kettangsür Khaled Zayed-i ashiba agi, totzü abenba truck pezü densema aid truck 200 Debarbü Karem Shalom crossing ajanga aitsü imlar.

Ita tenet dak tema rara aruba sülen Gaza-i teyari oset tali yoktsü Israel dang ajungshiba tali akumer, kong rara ajanga ki o jen raksatsüba den külemi nüburtem ayawara agi temeneper lir.

Iba rara nung Rafah crossing ya ajanga Gaza telungi humanitarian aid aser danga supplies tem yoka liasü, saka Israel-i Palestine tsütsü iba tesem amokbangba sülen hopta asem shi shibanga lir.

Palestine nunger refugee aika Gaza tsütsü nungi Egypt-i aitba ajanga teblemtsü tali akar aser parnoki par tsütsü Rafah crossing lapoktsü memulungi arur.

Israel-i teyari oset aiba

menokdanger ta ashir aser north tsütsü crossing tasen lapokba den külemi United States den lungjemer Gaza tzükümen tzümgang nung pier yanglúa tzüyimlen nungi teyari osettem bener yoker.

Kasa mapang United Nations indang tematiba court, International Court of Justice ajanga Israel dang Rafah mamaktsü Hokulbarnü totuyuba agüjaka yangji maneni operations agir.

Deobarnü Israel-i Rafah yimti amakba mapang Palestine nunger nisung pongu tepset ta osang ajanga ashir. Israel indang tanks tem iba yimti meketa lir saka tang tashi yimti telungi mait lir.

Israel-i Rafah nung jenoka aliba Hamas fighter samatsü yangji Israel nunger pua aliba kumzükner ta shir, saka yangji Palestine nunger tesem balala nungi jenoka aliba mechlinük balalai iba yimti amaktsü memulunger.

Israel-i Gaza amakba nung Palestine nunger 36,000 jüngnüsü tepsetogo ta Gaza indang health ministry ajanga ashir. October 7 nü Hamas-i anir telungpur temi Israel south tsütsü tesem kar maka nisung 1,200 shi tepseter nisung 250 dak tema pua bener aoba sülen Israel-i Gaza amak tenzük.

## Zelensky-i Biden & Xi na Ukraine peace summit nung adentsü jaok



lenirtem nem iba senden nung shilem agidaktsüner, ta ashi.

Ukraine-i mepeshiba sülen Swiss sorkari iba sentong ayongzükka agitsü.

Parnoki linük 160 nungi lenirtem jaokogo saka Russia bo iba senden nung shilem magitsü. Iba senden ya anogo ka dak tera tali dang agitsü imlar.

Iba senden nung Biden-i shilem agitsü magitsü mejangja. Kasa mapang nung sentong ayongertem i ashiba agi, senden nung shilem agitsü aliba linüktem rongnung G7, G20 aser BRICS group nung züngoksema aliba linüktem densema lir.

Russia tir Vladimir Putin-i iba ita tetenzükken, "parnoki onok mejaok" ta ashiba den onok pelashishia mejaokba sentong ka nung Russia-i shilem magitsü, ta shisem.

China-i iba hopta Brazil den külem sangdong ka ajanga, Russia aser Ukraine napronglai agizükba international peace conference ka parnoki pusemtsü, kong telok ajaki kasasa shilem agitsü aser yimzung atema sentongtem yanglutsü.

Maneni Zelensky-i ashiba agi, linük 80 dak temai iba senden nung shilem agitsüba jangjatsüogo aser ano lenirtem jaoktsü asoshi Ukraine-i merangdar.

## Burkina Faso mitkari ano küm pongu yimsü asütsü



Colonel Moussa Diallo

**Ouagadougou, Monupii/May 26 (Agencies):** Burkina Faso nung July ita mitkar yimsüsbü tembangtsü aliba jembishinür ano ita 60 atsülanga küm pongu parnokisa yimsü asütsü telemtetba agiogo.

"July 2, 2024 nungi tenzükka iba transition mapang ya ita 60 asütsü," ta Honibarnü iba jembishinür akaba sülen national dialogue process nung organising committee chairman Colonel Moussa Diallo-i ashi.

Honibarnep nungi tenzükka anogo ana national dialogue amentsü aliba senden nung charter tasenba nungya meyongnem agütsü, koba civilian nem yimsü südaktsütsü asoshi jembishinütsü liasü.

Mitkar temi 2022 küm tashiyim amshia sorkar atsüngdok aser taküm July tashinung election agia civilian nem yimsü südaktsütsü nangzuka liasü.

"Security tensa tajungba kumra iba transition ya tekeraba temdakja elections agitsü," ta mitkar lenir Ibrahim Traore-i meyongnem agüja aliba charter tasenba nung shia lir.

Iba charter nungya election agiba mapang Traore ya tir asoshi tokteptettsü mela lir.

Charter tasenba nungya assembly nung mena aliba traditional party tem nungi züngsemtem asoshi quota tem mamshitsü ta shia lir. Iba melena deputy tem shimsü

asoshi linük meimertem shimsü.

Burkina Faso yimtiba Ouagadougou nung iba senden amendang civil society nungi teshimtet nisungtem, security aser defence forces aser transitional assembly nungi ozung yanglurtem dena liasü, saka political party aikati shilem magi.

Election agitsü menuba ajanga Western aser Central Africa nung democracy sama aotsü ta aikati arendaka bileyer, kong küm pezü tsüngta mitkar tashi amshia sorkar atsüngdokba linük ti nung ataloka lir.

Burkina Faso nung telungpur telok temi 2015 küm nungi sorkar anema nokdaka arur aser iba mapang nisung meyirijang aika tepset aser million aika pei ki yutsür tesem balala nung jenoka lir. Mitkar sorkari linük nung iba tayongzükbatem mazükter.

Sorkari taoba mapang yimsü süa aliba France den mitkar tesendaktep rakdang aser security teyari Russia dang meshia liasü. Burkina Faso litsü tesadang ka sorkar kubok mali.

**Kyiv, Monupii/May 26 (Agencies):** Ukraine tir Volodymyr Zelensky-i Deobarnü, US tir Joe Biden aser China tir Xi Jinping na dang taruba ita Switzerland nung peace summit ka nung shilem agitsü mepeshia asüngdanggogo.

Ukraine nunger lenir yagi Kharkiv yimti nung nokdaker iba temepeshiba ya English agi agütsüba video ka ajanga sayuogo.

"United States lenir tir Biden aser China lenir tir Xi na densema linük balala lenirtem shirnok global peace summit nung shilem agitsü telemtetba agia mali parnok dang iba summit nung adentsü mepeshir," ta Zelensky-i ashi.

Zelensky-i ashiba agi, item lenirtemi shilem agitsüla kechiyong alima kintem timba kati mulunga agizükra mapa kuma inyaka aotsü tejangjaba akümer.

Paisa, Russia-i ashikotsütsü makokba linüktem nungi

## Neeraj Chopra Golden Spike Meet nung shilem magitsü



Neeraj Chopra

**Monupii/May 26, 2024**

(Agencies): Olympic champion javelin thrower Neeraj Chopra-i Deobarnü sangdong ka ajanga pa meyiru, saka kümdatagridia alitsü atema Ostrava Golden Spike meet nung shilem magitsü telemtetba agiogo, ta ashi.

Czech Republic nung asayatsü aliba iba asayamung ya May 28 nü tenzüksü. Chopra tawa training agiba mapang adductor muscles nung timtem tilaka ajangshiba sülen pai iba telemtetba agi.

Chopra-i ashiba agi, Olympics asayatsü aliba küm pai yirutsüsa kecha jenjang maginer, anungji iba asayamung nung shilem magitsü telemtetba agiogo, ta ashi.

"Tawa throwing session ka

sülen ni Ostrava nung shilem magitsü telemtetba agiogo, kechiyong adductor nung timtem ka aliba ajangshio. Ni taoba mapanga iba tetsü nung timtem adokogo, anungji tang amala mapang ka nung ni yirutsüsa kecha jenjang maginer," ta Chopra-i Instagram nung zültsü.

"Ken o jangjatsü atema ni yiruabo mali, saka Olympics asayatsü aliba küm kecha risk maginer anungji iba telemtetba agiogo. Ni kanga junga tanepstsü anguba sülen maneni asayamung balala nung shilem agitsü," ta pai shisem.

Asayamung ayongertemi, Chopra hopta ana tejakdang training agiba mapang yiruba ajanga iba asayamung nung shilem magitsü telemtetba agiogo ta sangdongba sülen

ghonda ishika dang lir Chopra-i ken o jangjashija liasü.

"Hopta ana tejadang training agiba mapang yiruba (adductor muscle) sülen pa Ostrava nung masayatetsa, saka tejaoker ka ama arua shilem agitsü," ta Golden Spike ayongertemi ashi.

Chopra taküm asayamung ana; Doha Diamond League aser Federation Cup nung shilem agiogo.

May 10 nü Doha Diamond League asayaba mapang pai nület meter 88.36 tsüteta silver medal ngua liasü.

Iba sülen küm asemshi lir taküm mezüngbuba domestic asayamung ka nung shilem agi aser pai May 15 nü Federation Cup nung gold medal ngua liasü. Iba asayamung nung pai nület meter 82.27 tsüteta liasü.

Mezüngbo Chopra-i pa Golden Spike nung shilem agitsü ta sangdunger maliasü, saka pa May 10 Doha Diamond League nung shilem agiba mapang Golden Spike nung tokteptsü ta sangdonga liasü.

Iba masüdang Chopra-i pa June 18 nü Turku, Finland nung Paavo Nurmi Games nung asayatsü ta shir liasü.

Golden Spike ayongertemi ashiba agi, Chopra-i iba asayamung nung shilem magitetsüsa akümبا indang odang parnok nem agütsügo aser pa melena Germany nunger European champion, Julian Weber asaytsü.

## Rooney Plymouth Argyle indang head coach kümogo

Wayne Rooney



**Monupii/May 26, 2024** England nunger asayartem (Agencies): Championship nung asayaba club Plymouth Argyle-i, taoba mapang captain Wayne England captain Wayne Rooney, parnok indang head coach asütsü shimogo.

Arishi küm 38 tain Rooney-i Ian Foster melenogo, shiba April 1 nü mapa nungi anenja liasü.

January 2 nü Birmingham City puri mapa nungi anentsüba sülen Rooney-i tang mezüngbuba coach mapa ka agizükogo. Birmingham City coach inyakba mapang Rooney lenisüba nung club asaya 15 nung teku nung tamakok ngua liasü. Pa iba club nung ita asem majung dang inyaka liasü.

Rooney-i coach mapa agizükba mapang Birmingham pur Championship play-off nung liasü saka parnok iba ita tetenzüklen League One-i relegate süogo.

Pilgrims coach mapa agizükba ya Rooney atema coach mapa pezübuba asütsü. Rooney ya asaya aliba mapang staff talila anisema aotsü.

## Mare Nostrum Swim Tour nung Srihari Nataraj-i silver angu



**Monupii/May 26, 2024**

(Agencies): Deobarnü Malaysia Masters tetsür kija final asaya nung PV Sindhu-i China tsür world no. 7 Wang Zhi Yi mekoki tanabuba jenjang nung tembangogo.

Fifth seed Sindhu, shibai Olympics nung medal ana tashi ngur lir, lai tatems 2022 küm Singapore Open aser Commonwealth Games koker lir aser 2023 küm Madrid Spain Masters nung tanabuba jenjang nung tembangogo liasü.

Final asaya nung mezüngbuba game akokba sülen Sindhu jenjang kanga jenjang liasü saka decider asayaba mapang la 11-3 agi tejakdang aliba Wang nem menepdakja asaya 21-16 5-21 16-21 agi mekoki liasü. Tena tsüngda minute 79 asaya.

Iba asayamung akok asübo Sindhu asoshi takok tulu ka süla saka final nung tamakok nguaka lai hopta tepeyong kanga jenjang asaya aruogo aser iba ajanga Paris Olympics masaya tsüngda lasasa dak

kanga temulung lemteta kümdaktsütsü. Küm ka dak tema sülen Sindhu tang mezüngbuba BWF world tour final ka nung asayaogo.

Sindhu-i taoba küm Arctic Open nung Wang makok, ajisüaka iba masüdang lai Wang anabenbo koker liasü.

Sindhu-i tesüsa Singapore Open akokba mapa final nung Wang tsükdakja liasü.

World No. 15 Sindhu Olympics nung tasembuba medal angutsü atema rangloker asayadar, ajisüaka la taoba küm temekok yiruba ajanga masayai

lir asaya tenzükba sülen jenjang masayateti arudar.

Sindhu-i joko mapang tatsüka temaba jenjang nung aliba asayar Carolina Marin, Tai Tzu Ying, Chen Yu Fei aser Akane Yamaguchi nunger mekoki aruda aser la Paris Olympics nungbo parnok den asayatsü imlar.

Ajsüaka arishi küm 28 tain asayar shiba Prakash Padukone Badminton Academy, Bengaluru nung training agidar, lai hopta tepeyong kanga jenjang asayaogo, saka asaya akoktsü aliba jenjang ka nungi Wang nem asaya kokdaktsüba ya taruba ita ishika tsüngda bentettsüsa akümtsü.

Sindhu Mongolbarnü nungi tenzüka ano Singapore Open super 750 tournament nung asayatsü.



**Monupii/May 26, 2024** ngua liasü.

(Agencies): India nunger nüngtugu tzüwar Srihari Nataraj-i, Canet-en-Roussillon, France nung 30buba Mare Nostrum swimming tour nung 50m backstroke event nung silver medal ka nguogo.

Nataraj, shiba Tokyo Olympics nung toktepa liasü, pai alizüng 25.50s nung tongteta silver medal nguogo.

Iba asaya nung Hungary nunger tzüwar Adam Jaszo-i 25.46s nung alizüng tongteta gold medal angu aser Great Britain nunger tzüwar Scott Gibson-i (25.64s) bronze medal

**BILEMDANGANG**  
"Yimyayimpong ajak angazüksü aser melenshitsü koka lir."